

- प्रधानमंत्री नरेंद्र मोदी अब ऊं कुछ देर पछे दिल्ली मांय विश्व धरोहर समिति री बैठक रो उद्घाटन करेला।
- संसद रा काले ऊं सरू व्हे रहया बजट सत्र ऊं पैला आज सर्वदलीय बैठक व्ही।
- गुरु पूर्णिमा रे मौके आज प्रदेशभर मांय न्यारा-न्यारा आयोजन-देवस्थान महकमो दो सौ ऊं बत्ती संतां अर महंतां रो कर्यो गुरु वंदन।
- प्रदेश रा न्यारा-न्यारा ठौड़ां मॉनसूनी बिरखा रा दौर चाले-अगूणी राजस्थान रा कुछ ठौड़ां आवता दो-तीन दिन मांय चौखी बिरखा री आस।

000

प्रधानमंत्री नरेंद्र मोदी अबे ऊं कुछ देर पछे नुवी दिल्ली रा भारत मंडपम मांय विश्व धरोहर समिति रा 46वां सत्र रो उद्घाटन करेला। ई मौके वे सभा ने सम्बोधित करेला। भारत, पैली बार विश्व धरोहर समिति री बैठक री मेजबानी कर रहयो है। बैठक ई मीना री 31 तारीख ताई चालेला। विश्व धरोहर समिति री मीटिंग साल मांय एक बार होवे है अर आ विश्व धरोहर रा बारा मांय सगळां मामलां रा प्रबंधन अर विश्व धरोहर सूची मांय भेळा करया जावण वालां ठौड़ां माथे फ़ैसलो लेवण सारू जिम्मेदार है। ई दौरान विश्व धरोहर सूची मांय नुवी ठौड़ां तैय करण, 124 मौजूदा विश्व धरोहर संपत्तियां रा संरक्षण हालात रपट, अंतर्राष्ट्रीय सहायता अर विश्व धरोहर निधि रा उपयोग समेत दूजा प्रस्तावां माथे चर्चा करी जायेला। केन्द्रीय संस्कृति मंत्री गजेन्द्र सिंह शेखावत बतायो की ई मीटिंग री मार्फत दिनयां भर ने भारत मांय व्ह्या विकास ने दिखावण रो मौको मिलेला।

000

प्रधानमंत्री नरेन्द्र मोदी अंतरराष्ट्रीय गणित ओलिम्पियाड मांय भारत रे ठांवां प्रदर्शन करता चौथी ठौड़ हासिल करण माथे मान जतायो है। एक सोशल मीडिया पोस्ट मांय श्री मोदी कहयो के भारत रो दल चार सोना रा अर एक चांदी रो तमगो जीत्यो है। वणा कहयो के ई कामयाबी ऊं नौजवानां ने प्रेरणा मिलेला अर इण ऊं गणित ने और बत्ती चावी बणावण मांय मदद मिलेला।

000

संसद रा बजट सत्र ऊं पैला केन्द्र सरकार कानी ऊं बुलाई ज्यी सगळा राजनैतिक दलां री मितिंंग आज नुवी दिल्ली मांय पूरी व्ही। ई दौरान सरकार संसद रा दोन्यु सदनां रा सुचारू संचालन ने तैय करण सारू सगळां राजनैतिक दलां ऊं मदद री आस करी। बैठक मांय केन्द्रीय मंत्री राजनाथ सिंह, किरेन रिजिजू, अर्जुन राम मेघवाल, जगत प्रकाश नड्डा, चिराग पासवान, रामदास अठावले अर कांग्रेस नेता जयराम रमेश अर गौरव गोगोई, राष्ट्रवादी कांग्रेस पार्टी नेता प्रफुल्ल पटेल, डी.एम.के. नेता टी.आर. बालू अर तिरुचि शिवा, आम आदमी पार्टी रा नेता संजय सिंह, ऑल इंडिया मजलिस-ए इत्तेहादुल मुस्लिमीन रा असदुद्दीन औवेसी समेत केई दूजा नेता मीटिंग मांय भेळा व्ह्या। ध्यानजोग है के संसद रो बजट सत्र काले ऊं सरू व्हे रहयो है।

वित्त मंत्री निर्मला सीतारामन मंगलवार ने लोकसभा मांय साल 2024-25 रो केन्द्रीय बजट पेश करेला। ई बजट सत्र मांय सरकार छह नुवा विधेयक पेश कर सके है। नरेन्द्र मोदी सरकार रा तीजा कार्यकाल रो ओ पैलो बजट व्हेला।

000

प्रधानमंत्री नरेंद्र मोदी कांग्रेस अध्यक्ष अर राज्यसभा मांय विपक्ष रा नेता मल्लिकार्जुन खरगे ने वां रा जन्मदिन माथे शुभकामनावां दी है। श्री खरगे आज 82 साल रा व्हे ग्या है। प्रधानमंत्री एक सोशल मीडिया पोस्ट मांय श्री खरगे रे लम्बा अर स्वस्थ जीवन री कामना करी है। कांग्रेस सांसद अर लोकसभा मांय विपक्ष रा नेता राहुल गांधी ई श्री खरगे ने वां रा जन्मदिन माथे शुभकामनावां दी।

000

कारगिल जुद्ध रा नायकां री वीरता अर बलिदान ने श्रद्धांजलि देवण सारू घातक स्ट्राइकर्स ब्रिगेड रो दस सदस्यां रो दल आज नसीराबाद पूग्यो। ई दल रो सेना रा ठांवां अहलकारां मान रे साथै स्वागत कर्यो। ध्यानजोग है के कारगिल ऑपरेशन विजय मांय भारतीय सेना री जीत रा 25 वां साल रे मौके नसीराबाद सैन्य टेशन ऊं साइकिलिंग अभियान गई 9 जुलाई रवाना व्ह्यो हो। टीम री अगुवाई अनुभवी साइकिल चालक कैप्टन सुविंशु कर्यो। ई दौरान ओ दल अरावली पहाडियां रा उबड़-खाबड़ अर चुणौती भरया हलकां मांय 13 दिनां मांय कुल 1 हजार 2 सौ 35 किलोमीटर री करड़ी यात्रा करी। यात्रा रे दौरान ओ दल कुंभलगढ़, माउंट आबू, उदयपुर, चित्तौड़गढ़, ब्यावर, अजमेर व्हेता आज नसीराबाद पूग्यो।

000

आज गुरु पूर्णिमा है। इण ने व्यास पूर्णिमा रा ऊं जाणी जावे है। ओ दिन आध्यात्मिक गुरुआं अर आचार्यां ने समर्पित है। ई मौके लोग आप रा गुरुआं रे प्रति अहोभाव प्रकट करे, जिण वां ने राह दिखायी अर जीवन ने नुवी दिशा दी है। प्रधानमंत्री नरेन्द्र मोदी ई मौके देशवासियां ने शुभकामनावां दी है। ई मौके प्रदेश मांय ई न्यारी-न्यारी ठौड़ां केई धार्मिक आयोजन व्हे रह्या है। ई दौरान न्यारा-न्यारा सम्प्रदायां रा प्रमुख गुरु पीठां अर आश्रमां मांय व्यास पीठ पूजन अर गुरु वंदन कर्यो जावे। देवस्थान महकमां कानी ऊं प्रदेश रा दो सौ पन्द्रह गुरु अर संतां रो "गुरु वंदन" करी ज्यो।

देवस्थान मंत्री जोराराम कुमावत गोविन्द देवजी अर मोती डूंगरी गणेश मिंदर रा महन्तां रो वंदन कर्यो। महकमां कानी ऊं 3100 रूप्या, शॉल अर श्रीफल दे र सनमानित करी ज्यो। भरतपुर मांय गुरु पूर्णिमा रो पर्व धार्मिक उमाव रे साथै मनायो जावे। मुख्यमंत्री भजन लाल शर्मा डीग रा पूंछरी का लौठा मांय श्रीनाथ जी मिंदर मांय पंचामृत अभिषेक कर ने पूजा-अर्चना करी। श्री शर्मा वठे सामुदायिक स्वास्थ्य केन्द्र मांय एक पेड मां के नाम अभियान रे तैत पौधा रोपण कर्यो अर लोगां ऊं बत्ती ऊं बत्ती पौधा लगावण री अरज करी। इण रे पछे श्री शर्मा लुधावई गांव मांय बड़ा हनुमान मिंदर मांय पूजा अर्चना करी अर महन्त गुरु रामदास समेत संतां रो पूजन कर ने आर्शीवाद लिया।

ई मौके सवाईमाधोपुर जिला मांय न्यारी-न्यारी ठौड़ां गुरुजनां रा आश्रमां मांय भण्डारा राख्यी ज्यो। पाली जिला रा जाड़ण रा विश्वदीप गुरुकुल मांय स्वामी महेश्वरानन्द जी रो देशी-विदेशी भक्तां पूजन कर्यो। बूंदी जिला मांय न्यारा-न्यारा गुरु थलां माथे गुरु पूजन करी ज्यो। वाण गंगा रा केशरीनन्दन आश्रम मांय सवा लाख हनुमान चालीसा पाठ री पूर्ण आहुती व्ही। डूंगरपुर जिला मांय संत मावजी महाराज री जन्म थळी सावलां रा हरि मिंदर मांय आज हजारो री तादाद मांय श्रद्धालु पूग्या अर गादीपति महंत अच्युतानंद महाराज रो आशीर्वाद लियो। कोटा मांय देवस्थान महकमां कानी ऊं संतां रो मान करी ज्यो। ऊर्जा मंत्री हीरालाल नागर मुख्यमंत्री रो संदेश संत प्रभाकर साहब ने सूप्यो। जैसलमेर, हनुमानगढ, टोंक अर झुन्झुनू जिला मांय ई गुरु पूर्णिमा पर्व धार्मिक उमाव रे साथै मनायी ज्यो।

000

प्रदेश मांय लारला 24 घंटां मांय कठेई-कठेई हलकां ऊं मझला दर्जा री बिरखा दर्ज करी ज्यी है। बूंदी हलकां मांय तेज बिरखा व्हेवण ऊं बरधा बांध मांय पाणी री चोखी आवक व्ही है जिण ऊं चादर चालण लागी है। चांदा रो ताळाब ई पूरी तरह भरीज ग्यो है। जैसलमेर मांय काले रात व्ही तेज बिरखा रे पछे जलाशयां मांय पाणी री आवक व्हे री है। मौसम केन्द्र जयपुर मुजब आज दौसा, बारां, अजमेर, जयपुर अर भीलवाड़ा जिलां मांय हळका ऊं मझला दर्जा री बिरखा होवण री आस जतायी है। महकमां मुजब बंगाल री खाड़ी मांय बण्या कम दबाव रा हलकां रा असर ऊं अगुणी राजस्थान रा कुछ ठौड़ां माथे आवता दिनां बिरखा री गतिविधियां चालती रहवण री आस है। वठे ई कोटा, उदयपुर, जयपुर, अजमेर अर भरतपुर संभाग मांय कठे-कठे ई भारी बिरखा अर 23 जुलाई ने एक दो ठौड़ां माथे घणी भारी बिरखा होवण री आस है।

000

पाली मांय लघु उद्योग भारती कानी ऊं लघु उद्यमी सम्मेलन व्ह्यो। शहर रा रूपरजत विहार मांय व्ह्या ई सम्मेलन मांय लघु, सूक्ष्म उद्योग अर उद्योगां रा विकास अर वां री समस्यावां माथे चर्चा व्ही। सम्मेलन रो उद्घाटन उद्योग मंत्री राज्यवर्धन सिंह राठौड़, उद्योग राज्यमंत्री के.के. विश्णोई अर पैली रा विधायक ज्ञानचंद पारख कर्यो। कार्यक्रम मांय कोई एक हजार उद्यमी भेळां व्ह्या।

000

प्रदेश मांय न्यारा-न्यारा हादसा मांय सात लोगां री मौत व्हे ग्यी अर 15 घायल व्हे ग्या। गंगापुर सिटी जिला रा सीतौड़ गांव कने एक ढाणी मांय काले रात बिजळी रो करंट लागण ऊं दो महिलावां री मौत व्हे ग्यी। बीकानेर जिला रा लूणकरणसर हलका मांय राजमार्ग 62 माथे आज पिकअप अर रोडवेज बस री टक्कर मांय एक मिनख री मौत व्हे ग्यी अर 11 घायल व्हे ग्या। घायलां ने बीकानेर रा पीबीएम ट्रौमा सेन्टर रैफर करी ज्यो है। वठे ई सिरौही जिला रा शिवगंज हलका मांय ब्यावर-पिंडवाड़ा राजमार्ग माथे जोधपुर ऊं सांवरिया सेठ रा दर्शन करण सारू कार मांय सवार व्हेर जा रीया श्रद्धालुआं री कार पलट ग्यी, जिण मांय कार मांय सवार एक मिनख री मौत व्हे ग्यी और चार गैरा घायल व्हे ग्या। घायलां ने शिवगंज अस्पताल मांय प्राथमिक ईलाज रे पछे जोधपुर रैफर करी ज्यो। वठे ई बीकानेर रा लूणकरणसर तहसील रा दुलमेरा गांव मांय डिग्गी मांय डूब जावण ऊं मां-बेटा री मौत व्हे ग्यी। जैसलमेर जिला रा रामदेवरा रा रामसरोवर ताळाब मांय आज एक मिनख रो शव मिल्यो।

000

प्रधानमंत्री नरेन्द्र मोदी 28 जुलाई ने आकाशवाणी ऊं प्रसारित करया जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित करया जावण वाळा ई कार्यक्रम री 112 वीं कड़ी व्हेला। ई कार्यक्रम सारू आप ई विचार अर राय मुफ्त नम्बर 1800-11-7800 रे मार्फत दे सको हो।

000

जम्मू—कश्मीर मांय अमरनाथ यात्रा मांय अजै ताई तीन लाख 86 हजार ऊं बत्ती श्रद्धालु पवित्र गुफा रा दर्शन कर चुक्या है। आ जात्रा ई साल 29 जून ऊं सरु व्ही ही। जात्रा रा 23 वां जत्था मांय आज संवारा तीन हजार एक सौ 13 जात्री जम्मू रा भगवती नगर जात्री निवास ऊं 123 वाहनां ऊं कश्मीर घाटी सारु रवाना व्ह्या। इण साल आ जात्रा 52 दिन चालेला अर आवता मीना री 19 तारीख ने श्रावण पूर्णिमा अर रक्षा बंधन रे दिन पूरी व्हेला।

000